

այժմ վերստին շարժեցան յուզել զխնդիրն զայն, որպէս յայտ առնեն յետագայ բանք հրովարտակին, զոր գրեալ է Մէլիք Զահր Սէյֆի Ահմէտ, առ կուսակալն Պաղեստինոյ. օրինակ զայս:

Յայտնի է ձեզ հրովարտակն զոր յառաջագոյն գրեցաք, թէ յանդիման եղեւ մեզ աստ յատենի մերում՝ դեսպան թագաւորին Վրաց. վասն արքունի գործոց ինչ: Եւ մեկնեալ աստի գնաց յերուսաղէմ. և սկսաւ անդ հակառակիլ և բռնանալ 'ի վերայ ազգին Հայոց յաղագս վանաց Ս. Յակոբայ սեփհականութեան նոցին: Եւ նոքա յանդիման եղեն մեզ աստ ատենիս և մատուցին զհրովարտակս և ըզմուրհակս առաջի դատաւորաց և մեծամեծաց քաղաքիս, յորս յայտնապէս տեսանիւր թէ՛ գործն է հաստատուն և աւարտեալ իրաւամբ և արդարութեամբ՝ զերծ յաւելաբանութենէ և 'ի ստութենէ: Եւ հանրագիր 'ի բաղմամբս ժողովրդոց՝ մատուցեալ առ թագաւորն. յորում ճառէր զճմարտութիւն իրին. գրեալ ճմարտութեամբ և ուղղութեամբ 'ի փառս միոյն Աստուծոյ, որ ունէր օրինակ զայս:

«Դատաւորք և գիտնականք և մեծամեծք Երուսաղէմի, եւ այլ մեծ և փոքր բաղմութիւն ժողովրդոց 'ի մի վայր գումարեալ գնացաք 'ի վանս Ս. Յակոբայ, որ է սեփհականութիւն ազգին Հայոց. յայտնել և ստուգել զգործն: Ժողովեցան անդ ժողովուրդք 'ի Հայոց և 'ի Վրաց, առաջի դեսպանի թագաւորին Վրաց: Հայք մատուցին զհրովարտակս եւ զմուրհակս՝ զորս ունէին 'ի ձեռս իւրեանց, յորս յայտնապէս գրեալ և ծանուցեալ էր թէ վանք Ս. Յակոբայ է սեփհականութիւն իւրեանց, և ինքեանք ժառանգեալ են մինչեւ ցայսօր ժամանակի»: Յետ այնորիկ հարցումն եղեւ և դեսպանին թէ՛ ունի՞ք և դուք զայսպիսի գիրս յաղագս Ս. Յակոբայ յայտարար իրաւանց ձերոց: Իսկ դեսպանն ոչ կարաց մատուցանել գիրս ինչ 'ի հաստատութիւն եւ 'ի վիպութիւն իրաւանց ազգին Վրաց, առաջի բաղմութեան ժողովոյն:

Յետ այսր դատաստանի և քննութեան՝ վերստին եկն դեսպան 'ի թագաւորէն Վրաց, և յանդիման եղեւ մեծի ատենիս՝ դարձեալ յաղագս վանաց Ս. Յակոբայ. և մեք հրամայեցաք գրել հրովարտակ վասն այնր: Եւ 'ի նմին